

戲說・長流水

鏡鮮个河壩，係一面歷史
悠悠仔流過，阿太个年代
水面映出个面容，係風霜
皺皺个手巴掌，毋願老
怙怙仔篩下个心心念念
嘎從手指罅¹流入烏水溝
一起風，捩捩轉个波螺皺²
撮³起一領纒線个大衿衫
跌落史蹟个目珠窟，水汀汀仔……
汀出个渡台悲歌
係原鄉一行一行个目汁

番綻个河壩，係一齣童年
橋頭下弄等，樵頭戲
窿入石縫个撈仔舞做牛頭馬面，打頭陣
強強摻蝦公、毛蟹嚇到面呷青，打孔翹
山腳下伙房屋个煙筒
歎出彎彎幹幹个鄉煙
係分出外打拚个遊子
尋得著行轉童年个路
又聽著阿姆个鑊剷在大鑊肚起八音
磬磬鏘鏘……
蒜頭、豆油、七層塔相爭鬥豔个胭脂味
侷到歸灶下
肚凹凹个碗筷
請出面紅濟炸个阿旦，打眼拐
一上桌，胲吮吮仔个口涎水
舐嘴躡鼻，牽絲到白鬚

1. 手指罅 suˋ ziiˋ la；指間的空隙。

2. 波螺皺 boˋ loˋ jiu；漩渦，水流迴旋處。

3. 撮 zebˋ；以三指抓取物品。

燥濂个河壩，係一尾泥蛇
日頭擎枷⁴，難到皺皮必壠个圓身罔無空
看毋著女媧五彩石補天穿个戲齣
趁毋入天時變面个田溝水瀝，蔭田心
啗啗咄咄，面皮打摺个天旱
頭臥臥仔掌等天色，敵大氣……
仰跔阿公个愁慮，共樣共樣
敢係雷公響，打亂看天食飯个命底
抑係月光帶嵐⁵，勘得來思量
一覺目
秋霖夜雨點點滴落戲棚頂成詩句
三更半夜，默默仔上上⁶萬物个想望

泥蛇敲下黃貢貢仔个身裝
涓涓仔掌過……
耕種人个心頭田
一瞞目
淳田淳坎⁷翕出一色青天
蒔入一坵坵浸青个增志
阿公个笑容，在水面打觔斗
環轉个禾黃米赤
結出一串串淦黃个篤實
禾鵞仔陣打陣，翼掀掀仔⁸
在吾目珠仁，畫過天
飛入田光水色，撮把
收冬戲

4.日頭擎枷 ngid\ teu\ kia\ ga\ ；太陽戴枷，即「日暈」。

5.月光帶嵐 ngied gong\ dai lan\ ；月暈。月暈出現，則知將起風。

6.上上 song\ song\ ；把東西放至高處或上方。

7.淳田淳坎 pud tien\ pud kam\ ；田地裡一片汪洋。

8.翼掀掀仔 id Pia\ Pia\ ；形容雙翅拍動時開合的樣子。